

ՀԻՄՆԱՆՏ ՏԻԳՐԱՆԻ ԵՍԱՑԱՆԸ

Հայաստանի քիմիական հասարակայնությունը ծանր կորուստ կրեց, Կյանքից հեռացավ Գիտությունների Ակադեմիայի Օրգանական քիմիայի ինստիտուտի հնագույն աշխատակից, նույն ինստիտուտի լաբորատորիայի վարիչ ՀԻՄՆԱՏ ՏԻԳՐԱՆԻ ԵՍԱՑԱՆԸ:

Եսայանը ծնվել է 1910 թ. Փարիզում, սփյուռքահայ մտավորականների՝ գրող Զապել և գեղանկարիչ Տիգրան Եսայանների ընտանիքում:

1929 թ. երիտասարդ Եսայանն ընդունվում է Փարիզի համալսարանի քիմիական ինստիտուտը, որը հաջողությամբ ավարտում է 1933 թ., 1934 թ. Եսայանների ընտանիքը փոխադրվում է մայր Հայաստան՝ 24-ամյա Եսայանը սկսում է աշխատել Կիրովի անվան գործարանի (այժմ՝ «Նաիրիտ» գիտաարտադրական միավորում) գիտահետազոտական լաբորատորիայում որպես քիմիկոս, այնուհետև ղեկավարում հետազոտական բաժինը:

1945 թ. Եսայանն ընդունվում է ԳԱ Քիմիական ինստիտուտի ասպիրանտուրան, որն ավարտելուց հետո 1949 թ. հաջողությամբ պաշտպանում է թեկնածուական դիսերտացիա: 1949 թվականից աշխատել է նույն ինստիտուտի օրգանական քիմիայի սեկտորում, այժմ ԳԱ Օրգանական քիմիայի ինստիտուտում, որպես կրտսեր գիտաշխատող, այնուհետև ավագ գիտաշխատող, իսկ 1959 թ. մինչև իր կյանքի վերջին օրը իբրև լաբորատորիայի վարիչ:

Եսայանը ճանաչված գիտնական էր: Նրա խոշոր ծառայությունը նրանում է, որ նա Հայաստանում հիմնադրեց բույսերի պաշտպանության քիմիական միջոցների սինթեզի նոր ուղղությունը, ծավալելով խորը հետազոտություններ պեստիցիդների ստացման և ուսումնասիրման բնագավառում:

Նրա գիտական գործունեությունը սերտ կապված էր գյուղատնտեսության պահանջների, արտադրության հետ: Երկար տարիներ համագործակցում էր Կիրովականի Քիմիական կոմբինատի հետ, գիտատեխնիկական մշակումներն ուղղելով դեպի ցիանուրաթթվի նպատակասլաց օգտագործումը:

Հրանտ Եսայանը հեղինակ է 100-ից ավելի գիտական հոդվածների և հեղինակային իրավունքների: Նրա գիտական ղեկավարությամբ պաշտպանվել են մի շարք դիսերտացիաներ:

Գիտական աշխատանքները Եսայանը զուգակցում էր ակտիվ հասարակական գործունեության հետ: Նա ավարտել է Մարքսիզմ-լենինիզմի երկամյա երեկոյան համալսարանը, երկու անգամ ընտրվել է շրջանային սովետի դեպուտատ, բազմիցս եղել է տեղական Մենդելևյան կազմակերպության և տեղկոմի նախագահ:

Եսայանը պարգևատրվել է «Պատվո նշան» շքանշանով և մի շարք մեդալներով: Արժանացել է Հայաստանի ԳԱ պատվավոր «Վաստակագրի»:

Հրանտ Եսայանը արտակարգ համեստ, ազնիվ, ոռմանտիկ հոգով, բարձր կուլտուրայի տեր անձնավորություն էր:

Հայտնի գիտնականի, հիանալի մարդու և լավ ընկերոջ հիշատակը միշտ վառ կմնա մեր սրտերում: